

PEMBERITAHUAN PERTANYAAN BAGI JAWAPAN BUKAN LISAN
MESYUARAT KEDUA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT
16 MEI HINGGA 26 MEI 2016

PERTANYAAN : BUKAN LISAN

DARIPADA : YB RAJA DATO' KAMARUL BAHRIN SHAH
[KUALA TERENGGANU]

SOALAN : 345

YB RAJA DATO' KAMARUL BAHRIN SHAH [KUALA TERENGGANU]
minta **PERDANA MENTERI** menyatakan apakah langkah-langkah
khusus Kerajaan untuk mengurangkan jurang perbezaan pendapatan di
antara rakyat termiskin dan yang berkemampuan.

**JAWAPAN: YB SENATOR DATO' SRI ABDUL WAHID B. OMAR,
MENTERI DI JABATAN PERDANA MENTERI**

Untuk makluman Ahli Yang Berhormat, Rancangan Malaysia Kesebelas (RMKe-11) memberi fokus utama kepada dasar pembangunan inklusif dan terus menangani jurang pendapatan dalam kalangan rakyat dengan memberi penekanan kepada usaha untuk meningkatkan peluang ekonomi dan penyertaan kumpulan isi rumah berpendapatan 40 peratus terendah (isi rumah B40), termasuk isi rumah miskin dan berpendapatan rendah. Ia dilaksanakan melalui strategi berikut:

Pertama: Membina Keupayaan dan Meningkatkan Potensi Menjana Pendapatan Melalui Pendidikan dan Latihan Kemahiran dengan:

- mengurangkan kadar keciciran pelajar dalam kalangan isi rumah B40 melalui penyediaan asrama, pengangkutan dan bantuan kewangan seperti Bantuan Persekolahan, Dana Kumpulan Wang Amanah Pelajar Miskin dan Rancangan Makanan Tambahan;
- menyediakan lebih banyak tempat bagi kumpulan pelajar B40 yang berpotensi tinggi di institusi pengajian tinggi dan pusat latihan kemahiran berdasarkan kriteria kelayakan dan kuota kemasukan khas;
- meningkatkan akses kepada pendidikan dan latihan kemahiran tinggi seperti Program Peningkatan Kapasiti dan Kapabiliti Kumpulan Khusus dengan peruntukan RM65 juta bagi tahun 2016; dan
- meningkatkan akses kumpulan sasar kepada maklumat dan peluang pekerjaan seperti pameran kerjaya dan JobsMalaysia.

Kedua: Pembangunan Keusahawanan dengan:

- meningkatkan sokongan keusahawanan secara bersepadu melalui pembiayaan mikro, latihan keusahawanan dan pemasaran dengan kerjasama agensi seperti Majlis Amanah Rakyat (MARA), TEKUN Nasional dan Amanah Ikhtiar Malaysia (AIM) bagi membantu usahawan mikro di bandar dan luar bandar. Sebanyak RM250 juta peruntukan telah disediakan untuk kedua-dua agensi tersebut bagi tahun 2016;
- meningkatkan produktiviti dengan menggalakkan penggunaan teknologi moden yang berasaskan kepada teknik pertanian moden dan amalan pertanian baik seperti Program Pembangunan Komuniti Bioekonomi dan Projek Ladang Pengganda untuk peningkatan penternakan lembu dan ladang ayam kampung;
- meningkatkan penggunaan teknologi maklumat dan komunikasi seperti Program eRezeki dan eUsahawan dengan peruntukan RM10 juta bagi tahun 2016; dan
- menyediakan ruang niaga atau premis perniagaan kepada usahawan mikro, kecil dan sederhana di bawah inisiatif MARA, Perbadanan Usahawan Nasional Berhad (PUNB) dan Perbadanan Kemajuan Ekonomi Negeri (PKEN).

Ketiga: Meningkatkan Pemilikan Kekayaan dengan memperluaskan peluang pelaburan dan saham amanah seperti Amanah Saham Wawasan (ASW) dan Amanah Saham Gemilang (ASG) yang dilaksanakan oleh Permodalan Nasional Berhad (PNB) serta Amanah Saham Hartanah yang dilaksanakan oleh Pelaburan Hartanah Berhad (PHB).

Keempat: Menangani Kos Sara Hidup Yang Meningkatkan dengan:

- meningkatkan penyediaan rumah mampu milik seperti Program Bantuan Rumah (PBR) Program Perumahan Rakyat (PPR), dan Rumah Mesra Rakyat (RMR). Sebanyak 74,633 buah rumah akan dibina bagi ketiga-tiga program tersebut sepanjang tempoh RMKe-11;
- meningkatkan perkhidmatan penjagaan kesihatan seperti Klinik 1Malaysia, Klinik Bergerak 1Malaysia dan Perkhidmatan *Flying Doctors*, terutamanya di kawasan luar bandar dan pedalaman. Sehingga kini, lebih 361 Klinik 1Malaysia, 16 Klinik Bergerak 1Malaysia, 13 perkhidmatan *Flying Doctor* di seluruh negara telah diwujudkan untuk memberi akses kepada perkhidmatan kesihatan kepada rakyat; dan
- memperkenalkan bantuan sokongan bagi mengurangkan kos sara hidup rakyat seperti Program Bantuan Rakyat 1Malaysia (BR1M), Program Penurunan Harga, Program 1Harga 1Malaysia, Kedai Rakyat 1Malaysia dan Kedai COOP 1Malaysia.

Kelima: Menangani Keperluan Kumpulan Sasar Khusus seperti warga emas, ibu tunggal, masyarakat Orang Asli serta Bumiputera Sabah dan Sarawak untuk meningkatkan peluang dan memperkukuh keupayaan mereka berfungsi dalam aktiviti ekonomi.

Keenam: Memperkukuh Sistem Penyampaian Program Isi Rumah B40 dengan melengkapkan pengukuran Pendapatan Garis Kemiskinan (PGK) dengan pembangunan Indeks Kemiskinan Pelbagai Dimensi (MPI) Malaysia. Ini akan membantu Kerajaan memberi tumpuan kepada dimensi lain selain pendapatan seperti pendidikan, kesihatan dan perumahan.